



山川典第三百十六卷

海部藝文二

海運疏

明陳于庭

題爲海運增繁財力大匱謹陳萬難之狀勉摠一得之愚仰冀聖明軫念事先該臣等題爲海運必難遞增船糧必難立辦仰祈速賜矜邊之長策勿循浮泛之空言仍勅當事大臣虛心觀理以圖實效事該戶部覆臣等題減海運遼糧緣由本部移咨督餉部院查議回稱查得山東海道最近腳價所省獨多若以所省之價加值以糴於民間似亦無難又山東往歲登萊之米多販於淮安今南岸旣禁其往則以北至遼陽亦爲肯應況登萊之間民間有米者每以變換銀錢爲難此本部院所親知者若將入京錢糧准改本色上納於民尤爲兩便則六十萬之派雖多而本部院原非獲已亦望東省院司道府爲協力同心之濟也若云減免是在本部主持非本部院之所敢言矣至於船隻已行淮安造五百隻原爲山東天津二處分用之資等因到部覆議具題奉明旨隨牌行登萊二道查議呈詳到臣該臣看得東省海運之艱臣等累累千百言具陳前疏然而非臣等之言也卽餉臣前

歲撫齊疏中所備述者也。今當事者不信臣言，併不信餉臣前日撫齊之言，而信餉臣今日督運之言。臣等具題下部之疏，該部不自主而仍聽餉臣之主議，是臣等可以不題而并明旨可不必下部。且臣疏發於正月初五日，而登萊鄉紳之揭於二月二十二日至長安，至則部疏以覆，乃曰山東派安本色六十萬，而從鄉紳之請欲減一半。夫山東海運六十萬，從古以來所未有之事也。卽三尺童子皆知其不能，豈藉鄉紳爲提調哉？臣非豪傑，豪傑未有臨事而不懼者，懼豈獨在黎民且召商之說，何居乎登萊道未嘗不極力招商，終歲竟無商至。天下軍民皆有籍，惟商無籍，本方之土著有定在，惟四至之商販無定在，商亦人也。雖愛財亦愛命，視遼如刀山劍林，視浮海渡遼如揚湯燖毛，彼遼中新募之兵，挑選於鄉籍名於冊，且驚惶潰散，不知所適，矧以閒或一來之商，安能勢驅術使，法繩利誘，使之方舟結艫運粟以輸塞下哉？是召商之令斷不能行，而臣不敢以終持不可行之說，誤軍興之重事。奉明旨之後，臣卽親至青萊，登集道府各官面議曰：今日之餉遼，必不可聚兵，兵不聚不可存遼，遼危而危，且及於宗社。此何等大事，可容推諉？部議委曲以完其數，所謂委曲者，或於窒處以闢支岐，或於絕處以求轉徑，今不得不舍商以責成於民運矣。於是又召民而諭之曰：爾有

粟勢必發糶今商旅絕矣加值以糶於民間已奉明旨矣加值糶買加值轉運或不病民而民不願也臣再四籌之自遼役繁而事事皆非民願事事皆強民之必從又不得不以加價糶運責成於官矣於是登萊濟青四府分定起運數目登萊任其多濟青任其少以登萊近海而青濟遠也此皆道府酌量分派非臣一人之私議也然臣雖強督諸臣分任其事而感額以憂運數之多真有萬難措處者登萊之間有米要換銀錢此以糶歲言也去歲止萊屬稍收而各郡多成赤壤幸乞得皇恩改折漕糧倉米二十一萬而今且海運六十萬是求改而反增避河而就海人情乎所憂在米矣部議淮安造船五百隻每隻不過載米五百石大者數百石此謂裝載三十萬之計耳且擬分撥天津而非悉發登萊亦奚當於山東之全運耶臣檄各屬分行雇募而船戶逃匿或僅以年久不堪之船索高價以應急需然則六十萬之儲安能飛渡所憂在船矣每船用水手大約二十餘人四郡起運大小不啻千船需用二萬餘人東人向不習海登萊水兵無處召募且往浙以厚餉招呼安所得長年之能涉海者乎所憂在水手之難招矣餉船出海每船用桅木二根每根五六丈山東原未產木大水必買於瓜儀篷柁鐵貓簞纜等且必買於南直水不能通則繼之以陸舟不能運則續之以車凡

百難致之物不脛而走皆藉人力轉移所憂在船具之難辦矣羊頭凹一帶路徑不一或出而由大洋或入而經沙淺自宗島至北套尤爲淺澀時或鯨鯢爲厄魚龍作難頃刻而滄溟爲昏須臾而風雲立變昨不知有今日之存且不能卜夕時之命所憂在地險矣清明前有出洋之忌四五月有颶颶之颶一至交秋風逆水落如去歲天津之船停泊於利津起剝於樂安寸步不能前進所憂在天時矣登州至蓋套萊州至三牯牛地各三千餘里涉歷礁礮間關天塹坎險難言今萊州至蓋甚遠青濟由登及蓋更遠二千里路無窮而時有限或不能爲兩運青濟之二船僅當登萊之一船青濟之一萬難於登萊之二萬其轉運之艱如此蓋套窄小不能齊進此船候彼船之交收後幫俟前幫之出港倘多船並至無可停泊即使陸續開洋風候不齊勢難循次暴雨疾風之時至驚濤拍浪之無休海無繫纜拋錨之處時有蛟蜃蠱颶之驚且起糧交納弊役需勒時日稽遲以急急行路之期爲徐徐坐守之日其交割之艱如此瀕海州縣多由河入海或距河三四百里一線之水時通時塞原非灌輸之地向無疏濬之功逢灘則淺閣遇涸則搬移斑白負戴牛馬輓芻重課甕足鰥黑憔悴孰爲憐憫其出海之艱如此米豆下船既防船隻之滲漏又慮榜人之偷盜且官造之船板枋未必

厚釘灰未必堅程工急則造作必屬倉皇船數多則彌縫必多粉飾數百石之糧係於船二十餘人之命寄於船一有損壞則黃泉不能以寸人鬼自此分途其防範之艱又如此夫海運若是其艱若是其可憂而其究有不可知者東省游荒一遇雨暘愆期便艱粒食藉使地無餘產安能民有餘糧此歲時之不可知者也泛汪洋之樯則風后司順逆之權輪渤溟之糧則天吳擅盈縮之柄必滄海所不收而後可供我軍之嚼蠟此天意之不可知者也近因加編至再文登寧海等處之民視此磽确荒阜直同敝屣棄田不耕撤家不顧臣等極多方之撫恤挽旣散之民心藉令民竄田荒賦逋額詘將何起運此人心之不可知者也海洋南北爲寇實繁履海如夷走死如驚萬一駕魚龍之棹泛橫海之舟阻截不必多人震撼皆得奪氣海波一揚運途自絕此寇患之不可知者也倘歲歲之倖可徼則滄海無盡藏之粟猶可養面黃無人色之兵苟漠漠之途難測則底事付於東流而浩嘆同於西柄海運豈可恃而浮海濟遼豈無戰守經久之長策哉皇上爲目前十數萬遼兵計不得不急餉爲急餉計不得不先恤東人蓋東人之苦海內所未嘗之苦也而東省之窮又海內所未有之窮也憫其艱危則當保其性命軫其繁勞則當節其財力奪盤中之餐而又加額外之賦民則何堪查

東省荒田最多有五六畝折一畝征糧者今以畝計則六畝當加四分二釐此寧登之民所以亟亟而思竄也臣以爲登萊二府既多任海運須免其續加之三釐五毫青濟分任海運則當免其三次加編之二釐以加值聊代其初編而以減免少寬其物力甘肅與辛辣相參民將樂於趨命此減編之當議者也東省錢糧原係隔年起徵今歲所徵者四十七年之加編二十一萬六千一百兩零乃本年新編應扣運過透支及撙遼兵養贍家口銀共五萬七千五百一十四兩零所存不過十五萬八千六百餘兩耳卽合通省舊遼餉與新編併算不過二十九萬一千五百九十餘兩耳計米一石抵遼糴價腳價約費盈兩是六十萬石之運須有六十萬金而今歲額征未及糴運之半則京邊錢糧勢不得不扣留以充糴運此扣解之當議者也東省春熟爲麥秋熟爲豆粟南人食米北人食麥因土俗之所宜爲甘食之常性今獨徵秋收之米豆不用春收之二麥秋成有限運額難充何不兼二麥收之以從民便此兼運之當議者也山左一遇饑饉米價如金當以豐歲之有餘備饉歲之不足臣以爲一遇年豐卽當預糴以爲明年轉運之地然後海運不因荒而廢遼兵不遇荒而餒預糴必須多銀多銀必須先發此預備之當議者也金復海蓋多膏壤欲久守遼陽必先屯四衛今彼中

地土多荒防守未備人以爲險而難犯而臣密令海道差官偵之絕無險阻倘夷兵問道深入則棄膏腴之地而委積貯之區遼陽之聲勢中閔立苦無糧而登萊之禍害切身自當罷運則今日之以重師圍守大將營屯春秋急耕農隙講武似爲經久之圖可戰可守此屯糧之當議者也夫建非常之業者必有預計之深心成不世之功者須有廣大之局面以天下之大何有於登萊四郡必屢責其加編惠以使人而後人爲我用若當事者執拘攣而責成效臣無計以使窮民之不逃又何計以使海運之立就誤運兼以誤遼臣滋懼矣至於留京邊以濟餉則餉臣言之急屯田以減餉諸臣悉言之兼用麥以廣儲多發銀以預糴又事理之固然而無俟於周諮博詢者其海運船隻已奉有明旨著該部嚴催報完船不至則糧不可運船不多則糧不可多運船隻報完不早則糧不能早運此則非臣之責矣伏乞勅下該部從長覆酌務求濟運庶將來不至誤遼而戰守有攸賴矣

海寇疏

王家彥

嘗觀海內地勢自江南以北沃野千里不治溝洫因嘆閩省海墘地如巾帨民耕無所且沙礫相薄耕亦弗收加以年荒賦急窮民緣是走海如驚長子孫于唐市指窟穴於臺灣橫海鷗張如先年周

三李魁奇鍾斌等其最毒者也崇禎五年劇賊劉香復徑逼五虎門掠閩安鎮幾搖省會計自漳之福清至省不知歷幾寨幾遊而中左居漳泉兩府之間爲全省之門戶由來爲賊所從入之逕扼抗宜嚴今幸數載稍寧而流氛未殲到處震鄰且山箐嘯聚者亦復時撲時起吸浪之鯨伺隙易動綢繆之策不可不講請以歷來祖制約略言之國初有衛所軍無別兵有指揮千百戶無別將無論戍陸皆軍卽烽火小埕南日浯嶼銅山五水寨之舟師無非軍也撫臣譚綸總兵戚繼光題復舊制每寨設福哨烏漿等號船四十餘隻於五寨中分三哨屯大洋賊船必經之處其餘各寨附近緊要港澳則分哨以防內侵又於道里適均海洋定爲兩寨會哨之地北抵浙之金盤南抵廣之柘林聯絡呼應戈船相望萬曆二十四年撫臣金學曾委分守張鼎思都司鄧鍾躬閱汛地復請添設岵山海壇湄州浯銅懸鍾礮山台山澎湖諸遊于一寨之中以一遊翼之錯綜迭出雖支洋窮澳無不搜焉自昇平日久而額軍額船頓失舊制指揮千百戶等官足不踰城市會哨之法遂杳然矣至因而選民兵募客兵編鄉兵又聯漁兵業與軍而五矣夫昔之爲軍者一而可以殺賊今之爲兵者五而籍愈虛賊愈熾談海事者所以長嘆息也按舊額復之依分哨會哨法而核之籍民客簡練之鼓鄉兵

而勿以官兵擾之復徵沿海四十二澳漁兵之乖覺者厚其犒餉偵賊所在照各邊例以爲海上耳目而頓制之皆今日不俟再計而決者也至巡司之與衛所並建當日江夏侯周德興念環海疎節闕目乃於中所隙處設四十五寨城射手百名以資邏警弘治十四年按臣陸偁始裁三分之一而寨兵益寥寥矣夫以四十五司四千五百之射手基布於寨與遊之間懸軍插羽聲勢俱猛今寨既鞠爲茂草巡司官無專職延挨年日二三弓兵勾攝他事以爲生涯餽廩之意已無存矣爲今之計莫若以本寨原餉仍募土民以充射手之數專令教師肄習弓矢之外不許妄行勾攝恣爲侵漁卒然遇警賊少則率此以應賊多則糾合各寨將所轄一方之水陸等兵共堵擊焉撫按巡臨則令其與衛所軍兵嚴行較藝以爲巡司之勸懲如此則官無虛設兵皆實用無地無殺賊之人矣戚繼光之平倭也雞鳴尋食殲厥無遺故至今倭猶惕息其餘威以犯華不利爲戒今賊且生生不已矣猶可留撫之一字以爲海上之傳燈乎自賊飽而陽以撫愚我將飽而陰以撫酬賊於是旗鼓雖設壁壘雖嚴而賊之去來動靜未有不先通於將者兵乘賊至則引下風以避之賊去則尾其後以送之抽矢扣輪以發虛聲遮襲商艇以當捕擊海波尙得有晏時乎惟曉然示以渠魁法在必殲以斷行

間之觀望則將無利於賊金粟馬羊之羶去而後陷陣死綬之志堅矣

郡守黃毅所海塘奏功序

黃洪憲

今皇帝五年天下吏當朝正月浙撫臣奏嘉郡海塘工鉅請留李太守董成卒報聞罷而李公因中
蜚語徙守梧鄉大夫集都下者相視而嘻曰縣官不念海災耶何爲徙李公李公去而天官推擇可
者以毅所黃公名上制曰可鄉大夫拊髀爵躍慶太守得人復相與諭公曰敝郡介在東表往遭兵
燹仍以水旱物力詘而民阨於危亡賴聖朝德澤暨有司先後噢咻之郡稍安堵今不幸罹海災蕭
然煩費士民思見明府如百穀之仰膏雨焉願明府自愛黃公獵纓而語曰唯唯否否竊聞之災由
人興故五行志曰奢侈逆祀厥災水又曰政令失時誅罰絕理厥水流入國邑夫政之溺民甚於海
故曰防民甚於防川吾不及目擊海患願圖所以固吾防者鄉大夫稽首曰幸甚于是明府蒞嘉約
己裕民敦道範俗其爲政要在禁煩文省浮費崇教化之實每月朔羣子弟讀法曉諭教訓之俗用
少變蓋自吾奉使而歸也見鄉士大夫宴有常品少年多逡巡禮讓鉅耨利而倡優拙鳴桴稀於道
庶幾哉凜凜嚮化矣人謂公下車以來天無颶風海無怒濤公亦時調錢穀嚴勾稽以助隄繇故不

踰時而塘工告成東南永賴督撫奏功狀上晉秩錫金有差而公首膺寵錫諸屬邑令徵余言爲賀
余叙述其治行所爲彌患防災者當不在經營畚鍤之餘也昔成周盛時道隆化洽越裳氏重譯而
至曰中國有聖人海不揚波今天子冲聖方隆成周之業得長厚如公者破觚斲雕順流與民更始
將風移俗易海晏河清兆民亟蒙福祉何論嘉郡頃者天曹業已奏最有如一日降璽書召公入朝
問何以治海邦公惟曰聖德日隆海波永且不揚臣何功之有顧毋効渤海太守曰此下里黃生言
也

開洋禁疏

傅元初

臣切見中國之財天產地生悉以供西北邊之用出不復返兼令軍需孔亟徒求之田畝加派編戶
此亦計之無如何也然利害有宜剖析時勢有宜變通有閉之乃釀隱禍而開之足杜奸萌者則如
閩中洋禁曾奉明旨然臣閩人也謹查先臣何喬遠曾有疏議謹詳其概則又未始不可採行者臣
請得接論之萬曆年間開洋市于漳州府海澄縣之月港一年得稅二萬有餘兩以充閩兵餉至于
末年海上久安武備廢弛遂致盜賊劫掠兼以紅毛番時來倡奪船貨官府以聞朝廷遂絕開洋之

稅然語云海者閩人之田海濱民衆生理無路兼以饑饉荐臻窮民往往入海從盜嘯聚亡命海禁一嚴無所得食則轉掠海濱海濱男婦束手受刃子女銀物盡爲所有爲害尤酷近雖鄭芝龍就撫之後屢立戰功保護地方海上頗見寧靜而歷稽往事自王直作亂以至於今海上固不能一日無盜特有甚不甚耳海濱之民惟利是視走死地如鶩往往至島外區脫之地曰台灣者與紅毛番爲市紅毛業據之以爲窟穴自台灣兩日夜可至漳泉內港而呂宋佛郎機之夷見我禁海亦時時私至雞籠淡水之地與奸民鬪出者市貨其地一日可至台灣官府卽知之而不能禁禁之而不能絕徒使沿海將領奸民坐享洋利有禁洋之名未能盡禁洋之實此皆臣鄉之大可憂者卽當事者譚海上事亦未能詳悉以生利弭害之計告于我皇上臣知而不言誼所不敢出也蓋海外之夷有大大西洋有東洋大西洋則暹邏東埔諸國道其國產蘇木胡椒犀角象牙諸貨物是皆中國所需而東洋則呂宋佛郎機也其國有銀山夷人鑄作銀錢獨盛中國人若往販大西洋則以其產物相抵若販呂宋則單得其銀錢是兩夷者皆好中國綾緞雜繒其土不蠶惟藉中國之絲到彼能織精好緞疋服之以爲華好是以中國湖絲百斤值銀百兩者至彼得價二倍而江西磁器福建糖品諸物皆

所嗜好佛郎機之夷則我人百工技藝有挾一技以往者雖徒手無不得食民爭趨之永樂間先後招徠東西二洋入貢之夷恭謹信順與他夷猝悍不同至若紅毛番一種其夷名加留色與佛郎機爭利不相得曩雖經撫臣大創初未嘗我怨一心通市據在台灣自明禁絕之而利乃盡歸于奸民矣夫利歸于奸民而使公家歲失二萬餘金之餉猶可言也利歸奸民而使沿海將領不肖有司因以爲奇貨掩耳盜鈴利權在下將來且有不可言者竊謂洋稅不開則有此害若洋稅一開除軍器硫黃礮硝違禁之物不許販賣外聽閩人以其土物往他如浙直絲客江西陶人各趨之者當莫可勝計即可復萬曆初年二萬餘金之餉以餉兵或有云可至五六萬而即可省原額之兵餉以解部助邊一利也沿海貧民多資以爲生計不至飢寒困窮聚而爲盜二利也沿海將領等官不得因緣爲奸利而接濟勾引之禍可杜三利也倘以此言可採則今日開洋之議洋稅給引或仍於海澄縣之月港或開于同安縣之中左所出有定引歸有定澳不許竄匿他泊即使漳泉兩府海防官督稽查而該道爲之考覆歲報其餉于撫臣有二萬餘之外者具冊報部以憑支用臣鄉弁鄭芝龍屢立奇功既受延世之賞仍責以海上捕盜賊誅奸細使人與船無恙計年量加陞賞其麾下士卒向聞

係芝龍散金以養之故所向有功今其麾下之餉或可就此酌給無責令久出財力爲公家幹事之理是又一利也竊考有宋之季市舶司實置在泉州載在舊制可考其時郡守諸臣有爲海舶祈風之詩此亦前事之可據者廣東香山澳亦見有稅額閩廣一體耳此非臣一人之言實閩省之公言也伏乞勅下閩省撫按查洋禁果否盡閉開洋果否無害有利廣詢漳泉士民著爲一定之規庶奸利可杜兵餉可裕矣

海月賦

謝杰

鑿波臣之來服矢寶目於明庭敦轄楫之遺則激皇王之濯靈帝嘉聲教之被訖鑒孤遐之款誠爰命二臣以于邁泛艤艫而東征余乃棄孥息辭弟兄耦星使趨王程出晉安道新靈駕飛廉馮大庭望洲島涉裊瀛翩然霞舉冷如風行比中流以遙矚值華月之方升瞻彼月兮太陰之精潮應而落潮應而興潮侵而闕潮盛而盈旣與潮而爲伍自與海而相仍此善下而大彼虛受而凝此浮天而爲岸彼借日而生明此納百谷而稱王彼從衆星而名卿滄桑以爲晝夜晦朔以爲死生被窮髮而黑經閭浮而青三蠖肥而滿六鼈奠而寧魚腦滅而滅龍伯感而傾旣渠渠而溟溟亦淵淵而洽洽

爰溫溫而曠曠復鼎鼎而熒熒倏忽異狀瞬息殊形方夫崦嵫既沒扶桑未啟光風乍融太宇轉露
下無驚濤上無微翳望舒舒而升與羿妻奔而騁轡織阿驂乘結璘翼衛重輪稅于歸墟合璧騰於
蒙汜黃道經於碧津赤路交乎黑齒滄嶼養魄沃焦抱珥員嶠奉規尾閭循緯碣石薄而鳧飛之罟
蕩而兔逝天墟浹而螢長析木浮而桂墜玉珧石華潛盜其靈海鏡方諸亦稟其氣非朧非朧非匿
非朧時五而三時八而二增潤重溟流輝萬里洗光金銀之宮湛碧珊瑚之址或縵者如縠或爛者
如綺或潔者如圭或平者如砥或好者如瑗或激者如矢或華者如蜃或躍者如鯉或如素鳳之下
池頭或如白鼉之嬉水次或如瑤瑟之鼓湘江或如鮫綃之綯蓬市或如寶筏渡於恆河或如玉華
點乎蒼珥或如螢火映於林塘或如梅花落夫沼沚或浮或沉赤烏浴而淵暉或滅或沒驪龍頷而
川媚或閃或爍電騰雲漢之墟或錯或落斗轉明河之渙想而像之驚心駭視至於皓靈披素潏潏
生紫儼若軒帝遺珠赤水廻雪宛轉清麗射人又若宓神歸於洛濱夜光盈盈蟾蜍在腹又若女狄
暮汲而育銀山雪屋千疊萬行又若伍相立馬錢塘陽侯疾驅金蚪狂舞又若澹臺碎壁水潏須臾
浪息微明不波又若武皇眺於影娥暘素續紛非練非組又若天孫夜渡河渚靈暉矚矚萬濤增妍

又若神劍沉於鐔淵茲時茲景洵不易得水鏡空明冰壺津液玉杵秋清元霜夜碧漢臯風迴環珮
淅瀝陽臺雨歇朝雲生白以泳其樂何極於是舉酒以屬諫議分韻賦詩余歌曰月出兮東方
水流兮湯湯我所思兮道路長欲往從之兮河無梁諫議亦歌曰月暈兮知天雨海水兮知天寒佳
期逝兮衆芳闕思美人兮隔雲端歌竟魚龍交奮餘景就畢滿船跼伏不寒而栗余獨怡然載展載
繹秋水之篇明月之什一闕未終颿舉兩腋流響溯清排山破石馮夷邇邇天吳辟易少焉風定雲
色猶黑諫議曰美哉色也洋洋奕奕宜諧宮商服之無斃朕彼乘輿南樓賦詩赤壁牛渚泛舟晉陽
卻敵洵夷險之殊致又遐邇之迴跡奚啻大明之與燭火海若之于河伯

航海賦

蕭崇業

眴眴癡人奉命中山之役戒艘於閩有鏡機子儼然造曰蓋聞寧僉竭身事主艱險不避人謂之愚
汲黯數好直諫難惑以非史稱其慧吾觀若貌愉而和行通而慤匪愚匪慧何故名癡豈有說耶癡
人良久不言乃莞爾而笑曰僕鄙野之人僻陋無心胡敢當二賢也顧卽之時事驗乎物情名亦有
自來矣且夫乘人鬪捷智者相傾而任理直前則愚之所以優於械也隨俗脂韋愚者相和而秉德